

摘藻堂四庫全書薈要

史部

欽定四庫全書薈要

史部  
宋史卷五十

詳校官編修<sub>臣</sub>王天祿



欽定四庫全書蒼會要卷五千六百七十八

史部

宋史卷五十

元中書右丞相總裁托克托等修

天文志第三

天文三

二十八舍上

二十八舍

東方角宿二星為天關其間天門也其內天庭也故黃道經其中七曜之所行也左角為天田為理主刑其南

為太陽道右角為將主兵其北為太陰道蓋天之三門  
猶房之四表星明大吉王道太平賢者在朝動搖移徙  
王者行左角赤明獄平暗而微小王道失陶隱居曰左  
角天津右角天門中為天關日食角宿王者惡之暈于  
角內有陰謀陰國用兵得地又主大赦月犯角大臣憂  
獄事法官憂黜又占憂在官中月暈其分兵起右角右  
將災左亦然或曰主水色黃有大赦月暈三重入天門  
及兩角兵起將失利歲星犯為饑熒惑犯之國衰兵敗

犯左角有赦右角兵起守之讒臣進政事急居陽有喜  
填星犯角為喪一曰兵起太白犯角羣臣有異謀辰星  
犯為小兵守之大水客星犯兵起五穀傷守左角色赤  
為旱守右角大水彗星犯之色白為兵赤所指破軍出  
角天下兵亂星孛于角白為兵赤軍敗入天市兵喪流  
星犯之外國使來入犯左角兵起雲氣黃白入右角得  
地赤入左有兵入右戰勝黑白氣入于右兵將敗

按漢永元銅儀以角為十二度而唐開元游儀角二

星十二度舊經去極九十一度今測九十三度半距  
星正當赤道其黃道在赤道南不經角中今測角在  
赤道南二度半黃道復經角中卽與天象合景祐測  
驗角三星十二度距南星去極九十七度在赤道外  
六度與乾象新書合今從新書為正

南門二星在庫樓南天之外門也主守兵禁星明則遠  
方來貢暗則外叛中有小星兵動客彗守之兵起

庫樓十星六大星庫也南四星樓也在角宿南一曰天

庫兵車之府也旁十五星三三而聚者柱也中央四小  
星衡也芒角兵起星亡臣下逆動則將行實為吉虛乃  
凶歲星犯之主兵熒惑犯之為兵旱月入庫樓為兵彗  
孛入兵饑客星入敵兵起流星入兵盡出赤雲氣入內  
外不安天庫生角有兵

平星二星在庫樓北角南主平天下法獄廷尉之象正  
則獄訟平月暈獄官憂熒惑犯之兵起有赦彗星犯政  
不行執法者黜

平道二星在角 宿間主平道之官武密曰天子八達  
之衢主轍軾明正吉動搖法駕有虞歲星守之天下治  
熒惑太白守為亂客星守車駕出行流星守去賢用姦  
天田二星在角北主畿內封域武密曰天子籍田也歲  
星守之穀稔熒惑守之為旱太白守穀傷辰星守為水  
災客星守旱蝗

天門二星在平星北武密云在左角南朝聘待客之所  
星明萬方歸化暗則外兵至月暈其外兵起熒惑入闕



梁不通守之失禮太白守有伏兵客星犯有謀上者  
進賢一星在平道西主卿相舉逸材明則賢人用暗則  
邪臣進太陰歲星犯之大臣死熒惑犯為喪賢人隱太  
白犯之賢者退歲星太白填星辰星合守之其占為天  
子求賢黃白紫氣貫之草澤賢人出

周鼎三星在角宿上主流亡星明國安不見則運不昌  
動搖國將移乾象新書引郊廓定鼎事以周衰奏無道  
鼎淪泗水其精上為星李太異曰商巫咸星圖已有周

鼎蓋在秦前數百年矣

按步天歌庫樓十星柱十五星衡四星平星平道天  
田天門各二星進賢一星周鼎三星俱屬角宿而晉  
志以左角為天田別不載天田二星隋志有之平道  
進賢周鼎晉志皆屬太微垣庫樓并衡星柱星南門  
天門平星皆在二十八宿之外唐武密及景祐書乃  
與步天歌合

亢宿四星為天子內朝總攝天下奏事聽訟理獄錄功

一曰疏廟主疾疫星明大輔忠民安動則多疾為天子  
正坐為天符秋分不見則穀傷糴貴太陽犯之諸侯謀  
國君憂日暈其分大臣凶多雨民饑疫月犯之君憂或  
大臣當之左為水右為兵月暈其分先起兵者勝在冬  
大人憂歲星犯之有赦穀有成守之有兵人多病留三  
十日以上有赦又曰犯則逆臣為亂熒惑犯居陽為喜  
陰為憂有芒角大人惡之守之久民憂多雨水又為兵  
填星犯穀傷民亡逆行女專政逆臣為謀守之有兵太

白犯之國亡民災逆行為兵亂有芒角貴臣戮守之有  
水旱災或為喪辰星犯之為水又為大兵守之米貴民  
疾歲旱盜起民相惡客星犯國不安色赤為兵旱黃為  
土功青黑使者憂守之穀傷一云有赦令黑民流彗犯  
國災出則有水兵疫臣叛白為喪孛星犯國危為水為  
兵入則民流出則其國饑流星入外國使來穀熟出為  
天子遣使赦令出李淳風曰流星入亢幸臣死雲氣犯  
之色蒼民疫白為土功黑水赤兵一云白民虐疾黃土

功

右亢宿四星漢永元銅儀十度唐開元游儀九度舊  
去極八十九度今九十一度半景祐測驗亢九度距  
南第二星去極九十五度

大角一星在攝提間天王坐也又為天棟正經紀也光  
明潤澤為吉青為憂赤為兵白為喪黑為疾色黃而靜  
民安動則人主好游月犯之大臣憂王者惡之月暈其  
分人主有服五星犯之臣謀主有兵太白守之為兵彗

星出其分主更改或為兵天子失仁則守之孛星犯為  
兵守之主憂客星犯守臣謀上出則人主受制流星入  
王者惡之犯之邊兵起雲氣青主憂白為喪黃氣出有  
喜

折威七星在亢南主斬殺斷軍獄月犯之天子憂五星  
犯將軍叛彗孛犯邊將死雲氣犯蒼白兵亂赤臣叛主  
黃白為和親出則有赦黑氣入人主惡之

攝提六星左右各三直斗杓南主建時節伺機祥其星

為楯以夾擁帝座主九卿星明大三公恣主弱色温不  
明天下安近大角近戚有謀太陰入主受制月食其分  
主惡之熒惑太白守起兵天下更主彗孛入主自將兵  
出主受制流星入有兵出有使者出犯之公卿不安雲  
氣入赤為兵九卿憂色黃喜黑大臣戮

陽門二星在庫樓東北主守隘塞禦外寇五星入五兵  
藏彗星守之外蕃犯塞兵起赤雲氣入主用兵

頓頑二星在折威東南主考囚情狀察詐偽也星明無

咎暗則刑濫彗星犯之貴人下獄

按步天歌大角一星折威七星左右攝提總六星頓  
頑陽門各二星俱屬角宿而晉志以大角攝提屬太  
微垣折威頓頑在二十八宿之外陽門則見於隋志  
而晉史不載武密書以攝提折威陽門皆屬角亢乾  
象新書以右攝提屬角左攝提屬亢餘與武密書同  
景祐測驗乃以大角攝提頓頑陽門皆屬於亢其說  
不同



氐宿四星為天子舍室后妃之府休解之房前二星適也後二星妾也又為天根主疫後二星大則臣奉度主安小則臣失勢動則徭役起日食其分卿相有讒諛一曰王者后妃惡之大臣憂日暈女主恣一曰國有憂日下興師月食其宿大臣凶后妃惡之一曰糴貴月暈大將凶人疫在冬為水主危以赦解之月犯左右郎將有誅一曰有兵盜犯右星主水掩之有陰謀將軍當之歲星犯有赦或立后守之地動年豐逆行為兵熒惑犯之

臣僭上一云將軍憂守有赦填星犯左右郎將有誅守  
之有赦色黃后喜或冊太子留舍天下有兵齊明赦太  
白犯之郎將誅入其分疾疫或云犯之拜將乘右星水  
災辰星犯貴臣暴憂守之為水為旱為兵入守貴人有  
獄乘左星天子自將客星犯牛馬貴色黃白為喜有赦  
或曰邊兵起後宮亂五十日不去有刺客彗星犯有大  
赦糴貴滅之大疫入有小兵一云主不安孛星犯糴貴  
出則有赦入為小兵或云犯之臣干主流星犯祕閣官

有事在冬夏為水旱乙巳占後宮有喜色赤黑後宮不安雲氣入黃為土功黑主水赤為兵蒼白為疾疫白後宮憂

按漢永元銅儀唐開元游儀氐宿十六度去極九十四度景祐測驗與乾象新書皆九十八度

天乳一星在氐東北當赤道中明則甘露降彗客入天雨

將軍一星騎將也在騎官東南總領車騎軍將部陣行

列色動搖兵外行太白熒惑客星犯之大兵出天下亂  
招搖一星在梗河北主北兵芒角變動則兵大行明則  
兵起若與棟星梗河北斗相直則北方當來受命中國  
又占動則近臣恣離次則庫兵發色青為憂白為君怒  
赤為兵黑為軍破黃則天下安彗星犯北邊兵動出其  
分邊兵大起孛犯蠻兵亂客星出蠻邦來貢一云北地  
有兵喪流星出有兵雲氣犯色黃白相死赤為內兵亂  
色黃兵罷白大人憂

帝席三星在大角北主宴獻酬酢星明王公災暗天下  
安星亡大人失位動搖主危彗犯主憂有亂兵客星犯  
主危

亢池六星在亢宿北亢舟也池水也主渡水往來送迎  
微細凶散則天下不通移徙不居其度中則宗廟有怪  
五星犯之川溢客星犯水蟲多死武密云主斷軍獄掌  
棄市殺戮與舊史異說

騎官二十七星在氐南天子虎賁也主宿衛星衆天下

安穉則騎士叛不見兵起五星犯為兵客星守之將出有憂士卒發流星入兵起色蒼白將死

梗河三星在帝席北天矛也一曰天鋒主北邊兵又主喪故其變動應以兵喪星亡國有兵謀彗星犯之北兵敗客星入兵出陰陽不和一云北兵侵中國流星出為兵赤雲氣犯兵敗蒼白將死

車騎三星在騎官南總車騎將主部陣行列變色動搖則兵行太白熒惑客星犯之大兵出天下亂

陣軍三星在氏南一云在騎官東北革車也太白熒惑  
守之主車騎滿野內兵無禁

天輻二星在房西斜列主乘輿若周官巾車宮也近尾  
天下有福五星客彗犯之則輦轂有變一作天福

按步天歌已上諸星俱屬氏宿乾象新書以帝席屬  
角亢池屬亢武密與步天歌合皆屬氏而以梗河屬  
亢占天錄又以陣車屬於亢乾象新書屬氏餘皆與

### 步天歌合

房宿四星為明堂天子布政之官也亦四輔也下第一  
星上將也次次將也次次相也上星上相也南二星君  
位北二星夫人位又為四表中為天衢為天關黃道之  
所經也南間曰陽環其南曰太陽北間曰陰環其北曰  
太陰七曜由乎天衢則天下和平由陽道則旱喪由陰  
道則水兵亦曰天駟為天馬主車駕南星曰左驂次左  
服次右服次右驂亦曰天廐又主開閉為畜藏之所由  
星明則王者明驂星大則兵起離則民流左驂服亡則



東南方不可舉兵右亡則西北不可舉兵日食其分為  
兵大臣專權日暈亦為兵君臣失政女主憂月食其宿  
大臣憂又為王者昏大臣專政月暈為兵三宿主赦及  
五舍不出百日赦太陰犯陽道為旱陰道為雨中道歲  
稔又占上將謀當天門天駟穀熟歲星犯之更政令又  
為兵為饑民流守之大赦天下和平一云良馬出熒惑  
犯馬貴人主憂色青為喪赤為兵黑將相災白芒火災  
守之有赦令十日勾己者臣叛填星犯之女主憂勾己

相有誅守之土功興一曰旱兵一曰有赦令太白犯四  
邊合從守之為土功出入霜雨不時辰星犯有殃守之  
水災一云北兵起將軍為亂客星犯歷陽道為旱陰道  
為水國空民饑色白有攻戰入為糴貴彗星犯國危人  
亂其分惡之孛星犯有兵民饑國災流星犯之在春夏  
為土功秋冬相憂入有喪乙巳占出其分天子恤民下  
德令雲氣入赤黃吉如人形后有子色赤宮亂蒼白氣  
出將相憂

按漢永元銅儀唐開元游儀房宿五度舊去極百八  
度今百十度半景祐測驗房距南第二星去極百十  
五度在赤道外二十三度乾象新書在赤道外二十  
四度

鍵閉一星在房東北主闕籥明吉暗則宮門不禁月犯  
之大臣憂火災歲星守之王不宜出填星占同太白犯  
將相憂熒惑犯主憂彗星客星守之道路阻兵起一云  
兵滿野

鈞鈐二星在房北房之鈐鍵天之管籥王者至孝則明  
又曰明而近房天下同心房鈞鈐間有星及踈折則地  
動河清月犯之大人憂車駕行日食其分將軍死歲星  
守之為饑去其宿三寸王失政近臣起亂熒惑守之有  
德令太白守喉舌憂填星守王失土彗星犯宮庭失業  
客星流星犯王有奔馬之敗

東咸西咸各四星東咸在心北西咸在房西北日月五  
星之道也為房之戶以防淫泆也明則信吉東咸近鈞

鈴有讒臣入西咸近上及動有知星者入月五星犯之  
有陰謀又為女主失禮民饑熒惑犯之臣謀上與太白  
同犯兵起歲星填星犯之有陰謀流星犯后妃恣王有  
憂客星犯主失禮后妃恣

罰三星在東西咸正南主受金罰贖曲而斜列則刑罰  
不中彗星客星犯之國無政令憂多枉法

日一星在房宿南太陽之精主昭明令德明大則君有  
德令月犯之下謀上歲星守王得忠臣陰陽和四夷賓

五穀豐太白熒惑犯之主有憂客星彗星犯之主失位  
從官二星在房宿西南主疾病巫醫明大則巫者擅權  
彗孛犯之巫臣作亂雲氣犯黑為巫臣戮黃則受爵

按步天歌以上諸星俱屬在房日一星晉隋志皆不  
載以他書考之雖在房宿南實入氐十二度半武密  
書及乾象新書惟以東咸屬心西咸屬房與步天歌  
不同餘皆昭合

心宿三星天王正位也中星曰明堂天子位為大辰主

天下之賞罰前星為太子後星為庶子星直則王失勢  
明大天下同心天下變動心星見祥搖動則兵離民流  
日食其分刑罰不中將相疑民饑兵喪日暈王者憂之  
月食其宿王者惡之三公憂下有喪月暈為早穀貴蟲  
生將凶與五星合大凶太陰犯之大臣憂犯中央及前  
後星主惡之出心大星北國旱出南君憂兵起歲星犯  
之有慶賀事穀豐華夷奉化色不明有喪早熒惑犯之  
大臣憂貫心為饑與太白俱守為喪又曰熒惑居其陽

為喜陰為憂又曰守之主易政犯為民流大臣惡之守  
星南為水守北為旱逆行大臣亂填星犯之大臣喜穀  
豐守之有土功留舍三十日有赦居久人主賢中犯明  
堂火災逆行女主干政太白犯糴貴將軍憂有水災不  
出一年有大兵舍之色不明為喪逆行環繞大人惡之  
辰星犯明堂則大臣當之在陽為燕在陰為塞北不則  
地動大雨守之為水為盜客星犯之為旱守之為火災  
舍之則糴貴民饑彗星犯之大臣相疑守之而出為蝗



饑又曰為兵星孛其分有兵喪民流流星犯臣叛入之  
外國使來色青為兵為憂黃有土功黑為凶雲氣入色  
黃子孫喜白亂臣在側黑太子有罪

按漢永元銅儀唐開元游儀心三星皆五度去極百  
八度景祐測驗心三星五度距西第一星去極百十  
四度

積卒十二星在房西南五營軍士之象主衛士掃除不  
祥星小為吉明則有兵一星亡兵少出二星亡兵半出

三星亡兵盡出五星守之兵起不則近臣誅彗星客星  
守之禁兵大出天子自將雲氣犯之青赤為大臣持政  
欲論兵事

按步天歌積卒十二星屬心晉志在二十八宿之外  
唐武密書與步天歌合乾象新書乃以積卒屬房宿  
為不同今兩存其說

尾宿九星為天子後宮亦主后妃之位上第一星后也  
次三星夫人次星嬪妾也亦為九子均明大小相承則

後宮有序子孫蕃昌明則后有喜穀熟不明則后有憂  
穀荒日食其分將有疾在燕風沙兵喪後宮有憂人君  
戒出日暈女主喪將相憂日食其分貴臣犯刑後宮有  
憂月暈有疫大赦將相憂其分有水災后妃憂太陰犯  
之臣不和將有憂歲星犯穀貴人之妾為嫡臣專政守  
之旱火災熒惑犯之有兵留二十日水災留三月客兵  
聚入之人相食又云宮內亂填星犯之色黃后妃喜入  
為兵饑盜賊逆行妾為女主守之而有芒角更姓易政

太白犯入大臣起兵久留為水災出入舍守糴貴兵起  
後宮憂失行軍破城亡辰星犯守為水災民疾後宮有  
罪者兵起入則萬物不成民疫客星犯入宮人惡之守  
之賤女暴貴出則為風為水後宮惡之兵罷民饑多死  
彗星犯后感主宮人出兵起宮門多土功出入貴臣誅  
有水災亭犯多土功大臣誅守之宮人出出為大水民  
饑流星入犯色青舊臣歸在春夏後宮有口舌秋冬賢  
良用事出則後宮喜有子孫色白後宮妾死出入風雨

時穀熟入后族進祿青黑則后妃喪雲氣入色青外國  
來降出則臣有亂赤氣入有使來言兵黑氣入有諸侯  
客來

按漢永元銅儀尾宿十八度唐開元游儀同舊去極  
百二十度一云百四十度今百二十四度景祐測驗  
亦十八度距西行從西第二星去極百二十八度在  
赤道外二十二度乾象新書二十七度

神宮一星在尾宿第三星旁解衣之內室也

天江四星在尾宿北主太陰明動為水兵起星不具則  
津梁不通參差馬貴月犯為兵為臣彊河津不通熒惑  
犯大旱守之有立主太白犯暴水彗星犯為大兵客星  
入河津不通流星犯為水為饑赤雲氣犯車騎出青為  
多水黃白天子用事兵起入則兵罷

傅說一星在尾後河中主章祝官也一曰後宮女巫也  
司天王之內祭祀以祈子孫明大則吉王者多子孫輔  
佐出不明則天下多禱祠亡則社稷無主入尾下多祝

詛左氏傳天策焯焯即此星也彗星客星守之天子不  
享宗廟赤雲氣入巫祝官有誅者

魚一星在尾後河中主陰事知雲雨之期明大則河海  
水出不明則陰陽和多魚亡則魚少動搖則大水暴出  
出則河大魚多死月暈或犯之則旱魚死熒惑犯其陽  
為旱陰為水填星守之為旱赤雲氣犯出兵起將憂入  
兵罷黃白氣出兵起

龜五星在尾南主卜以占吉凶星明君臣和不明則上

下乖熒惑犯為旱守為火客星入為水憂流星出色赤黃為兵青黑為水各以其國言之赤雲氣出卜祝官憂按神宮傳說魚各一星天江四星龜五星步天歌與他書皆屬尾而晉志列天江於天市垣以傳說魚龜在二十八宿之外其說不同

箕宿四星為後宮妃后之府亦曰天津一曰天雞主八風又主口舌主蠻夷星明大穀熟不正為兵離從天下不安中星衆亦然糴貴凡日月宿在箕壁翼軫者皆為



風起舌動三日有大風日犯或食其宿將疾佞臣害忠  
良皇后憂大風沙日暈國有妖言月食為風為水旱為  
饑后惡之月暈為風穀貴大將易又王者納后月犯多  
風糴貴為旱女主憂君將死后宮干政歲星入宮內口  
舌歲熟在箕南為旱在北為有年守之多惡風穀貴民  
饑死熒惑犯地動入為旱出則有赦久守為水逆行諸  
侯相謀人主惡之填星犯女主憂久留有赦守之后喜  
有土功色黃光潤則太后喜又占守有水守九十日人

流兵起蝗太白犯女主喜入則有赦出為土功糴貴守  
之為旱為風民疾出入留筭五穀不登多蝗辰星犯有  
赦守則為旱動搖色青臣自戮又占為水溢旱火災穀  
不成客星入犯有土功宮女不安民流守之為饑色赤  
為兵守其北小熟東大熟南小饑西大饑出其分民饑  
大臣有棄者一云守之秋冬水災彗星犯守蠻夷自滅  
出則為旱為兵北方亂孛犯為外夷亂糴貴守之外夷  
災出為穀貴民死流亡春夏犯之金玉貴秋冬土功興

入則多風雨色黃外夷來貢雲氣出色蒼白國災除入  
則蠻夷來見出而色黃有使者出箕口歛為雨開為多  
風少雨

按漢永元銅儀箕宿十度唐開元游儀十一度舊去  
極百八十度今百二十度景祐測驗箕四星十度距  
西北第一星去極百二十三度

糠一星在箕舌前杵西北明則豐熟暗則民饑流亡  
杵三星在箕南主給庖春動則人失金甌縱則豐橫則

大饑亡則歲荒移徙則人失業熒惑守民流客星犯守  
歲饑彗孛犯天下有急兵

按晉志糠一星杵三星在二十八宿之外乾象新書  
與步天歌皆屬箕宿

北方南斗六星天之賞祿府主天子壽算為宰相爵祿  
之位傳曰天廟也丞相太宰之位褒賢進士稟受爵祿  
又主兵一曰天機南二星魁天梁也中央二星天相也  
北二星天府廷也又謂南星者魁星也北星杓也第一

星曰北亭一曰天開一曰鐵鑽石申曰魁第一主吳二  
會稽三丹陽四豫章五廬江六九江星明盛則王道和  
平帝王長齡將相同心不明則大小失次芒角動搖國  
失忠臣兵起民愁日食在斗將相憂兵起皇后災吳分  
有兵日暈宰相憂宗廟不安月食其分國饑小兵后夫  
人憂月暈大將死五穀不生月犯將臣黜風雨不時大  
臣誅一歲三八大赦又占入為女主憂趙魏有兵色惡  
相死歲星犯有赦久守水災穀貴守及百日兵用大臣

死熒惑犯有赦破軍殺將火災入二十日糴貴四十日  
有德令守之為兵盜久守災甚出斗上行天下憂不行  
臣憂入内外有謀守七日太子疾填星犯為亂入則失  
地逆行地動出入留二十日有大喪守之大臣叛又占  
逆行先水後旱守之國多義士太白犯之有兵臣叛留  
守之破軍殺將與火俱入白爍臣子為逆久則禍大辰  
星犯水穀不成有兵守之兵喪客星犯兵起國亂入則  
諸侯相攻多盜大旱宮廟火穀貴七日不去有赦彗星

犯國主憂出則其分有謀入為水災宮中火下謀上有  
亂兵入則為火大臣叛孛犯入下謀上有亂兵出則為  
兵為疾國憂流星入蠻夷來貢犯之宰相憂在春天子  
壽夏為水秋則相黜冬大臣逆色赤而出斗者大臣死  
雲氣入蒼白多風赤旱出有兵起宮廟火入有雨赤氣  
兵黑主病

按漢永元銅儀斗二十四度四分度之一唐開元游  
儀二十六度去極百十六度今百十九度景祐測驗

亦二十六度距魁第四星去極百二十二度

鼈十四星在南斗南主水族不居漢中川有易者熒惑守之為旱辰星守為火客星守為水流星出色青黑為水黃為旱雲氣占同一曰有星守之白衣會主有水

天淵十星一曰天池一曰天泉一曰天海在鼈星東南九坎間又名太陰主灌溉溝渠五星守之大水河決熒惑入為旱客星入海魚出彗星守之川溢傷人

狗二星在南斗魁前主吠守以不居常處為災熒惑犯



之為旱客星入多土功北邊饑守之守禦之臣作亂

建六星在南斗魁東北臨黃道一曰天旗天之都闕為  
謀事為天鼓為天馬南二星天庫也中二星市也鐵鎖  
也上二星為旗附斗建之間三光道也主司七曜行度  
得失十一月甲子天正冬至大歷所起宿也星動人勞  
役月犯之臣更天子法掩之有降兵月食其分皇后姊  
姪當黜月暈大將死五穀不成蛟龍見牛馬疫月與五  
星犯之大臣相譖有謀亦為關梁不通大水歲星守為

旱糴貴死者衆諸侯有謀入則有兵熒惑守之臣有黜者諸侯有謀糴貴入則關梁不通馬貴守旗跗三十日有兵填星守之王者有謀太白守外國使來辰星守為水災米貴多病彗孛客星犯之王失道忠臣黜客星守之道路不通多盜流星入下有謀色赤昌

天弁九星

弁一作辨

在建星北市官之長主列肆闐闐市籍

之事以知市珍也明盛則萬物昌不明及彗客犯之糴貴久守之囚徒起兵

天雞二星在牛西一在狗國北主異鳥一曰主候時熒惑舍之為旱雞多夜鳴太白熒惑犯之為兵填星犯之民流亡客星犯水旱失時入為大水

狗國四星在建星東南主三韓鮮卑烏桓獺狃沃且之屬星不具天下有盜不明則安明則邊寇起月犯之烏桓鮮卑國亂熒惑守之外夷兵起太白守之鮮卑受攻客星守其王來國中

天籥八星在北斗杓第二星西主開閉門戶明則吉不

備則闕籥無禁客星彗星守之闕梁閉塞

農丈人一星在南斗西南老農主稼穡者又主先農農  
正官星明歲豐暗則民失業移徙歲饑客星彗星守之  
民失耕歲荒

按步天歌已上諸星皆屬南斗晉志以狗國天雞天  
弁天籥建星皆屬天市垣餘在二十八宿之外乾象  
新書以天籥農丈人屬箕武密又以天籥屬尾互有  
不同

牛宿六星天之闕梁主犧牲事其北二星一曰即路一  
曰聚火又曰土一星主道路次二星主闕梁次三星主  
南越明大則王道昌闕梁通牛貴怒則馬貴動則牛災  
多死始出而色黃大豆賤赤則豆有蟲青則大豆貴星  
直糴賤曲則貴日食其分兵起暈為陰國憂兵起月食  
有兵暈為水災女子貴五穀不成牛多暴死小兒多疾  
月暈在冬三月百四十日外有赦暈中央大星大將被  
戮月犯之有水牛多死其國有憂歲星入犯則諸侯失

期留守則牛多疫五穀傷在牛東不利小兒西主風雪  
北為民流逆行宮中有火居三十日至九十日天下和  
平道德明正熒惑犯之諸侯多疾臣謀主守則穀不成  
兵起入或出守斗南赦填星犯之有土功守之雨雪民  
人牛馬病太白犯之諸侯不通守則國有兵起入則為  
兵謀人多死辰星犯敗軍移將臣謀主客星犯守之牛  
馬貴越地起兵出牛多死地動馬貴彗星犯之吳分兵  
起出為糴貴牛死字犯改元易號糴貴牛多死吳越兵

起下當有自立者流星犯之王欲改事春夏穀熟秋冬穀貴色黑牛馬昌闕梁入貢雲氣倉白橫貫有兵喪赤亦為兵黃白氣入牛蕃息黑則牛死

按漢永元銅儀以牽牛為七度唐開元游儀八度舊去極百六度今百四度景祐測驗牛六星八度距中央大星去極百十度半

天田九星在斗南一曰在牛東南天子畿內之田其占與角北天田同客星犯之天子憂彗孛犯守之農夫失

業

河鼓三星在牽牛西北主天鼓蓋天子及將軍鼓也一  
曰三鼓主天子三軍中央大星為大將軍左星為左將  
軍右星為右將軍左星南星也所以備關梁而拒難也  
設守險阻知謀徵也鼓欲正直而明色黃光澤將吉不  
正為兵憂星怒則馬貴動則兵起曲則將失計奪勢有  
芒角將軍凶猛象也亂搖差度亂兵起月犯之軍敗亡  
五星犯之兵起彗星客星犯將軍被戮流星犯諸侯作



亂黃白雲氣入之天子喜赤為兵起出則戰勝黑為將死青氣入之將憂出則禍除

左旗九星在河鼓左旁右旗九星在牽牛北河鼓西南天之鼓旗旌表也主聲音設險知敵謀旗星明大將吉五星犯守兵起

織女三星在天市垣東北一曰在天紀東天女也主果蓏絲帛珍寶王者至孝神祇咸喜則星俱明天下和平星怒而角布帛貴陶隱居曰常以十月朔至六七日晨

見東方色赤精明者女工善星亡兵起女子為侯織女  
足常向扶筐則言不向則絲綿大貴月暈其分兵起焚  
惑守之公主憂絲帛貴兵起彗星犯后族憂星孛則有  
女喪客星入色青為饑赤為兵黃為旱白為喪黑為水  
流星入有水盜女主憂雲氣入蒼白女子憂赤則為女  
子兵死色黃女有進者

漸臺四星在織女東南臨水之臺也主晷漏律呂事明  
則陰陽調而律呂和不明則常漏不定客星彗星犯之

陰陽反戾

輦道五星在織女西主王者游嬉之道漢輦道通南北  
宮其象也太白熒惑守之御路兵起

九坎九星在牽牛南主溝渠道引泉源疏瀉盈溢又主  
水旱星明為水災微小吉月暈為水五星犯之水溢客  
星入天下憂雲氣入青為旱黑為水溢

羅堰三星在牽牛東拒馬也主隄塘壅蓄水源以灌溉  
也星明大則水泛溢

天桴四星在牽牛東北橫列一曰在左旗端鼓桴也主漏刻暗則刻漏失時武密曰主桴鼓之用動搖則軍鼓用前近河鼓若桴鼓相直皆為桴鼓用太白熒惑守之兵鼓起客星犯之主刻漏失時

按步天歌已上諸星俱屬牛宿晉志以織女漸臺輦道皆屬太微垣以河鼓左旗右旗天桴屬天市垣餘在二十八宿之外武密以左旗屬箕屬斗右旗亦屬斗漸臺屬斗又屬牛餘與步天歌同乾象新書則又

以左旗織女漸臺輦道九坎皆屬於斗

須女四星天之少府賤妾之稱婦職之卑者也主布帛  
裁製嫁娶星明天下豐女巧國富小而不明反是日食  
在女戒在巫祝后妃禱祠又占越分饑后妃疾日暈後  
宮及女主憂月食為兵旱國有憂月暈有兵謀不成兩  
重三重女主死月犯之有女惑有兵不戰而降又曰將  
軍死歲星犯之后妃喜外國進女守之多水國饑喪糴  
貴民大災熒惑犯之大臣皇后憂布帛貴民大災守之

土人不安五穀不熟民疾有女喪又為兵入則糴貴逆  
行犯守大臣憂居陽喜陰為憂填星犯守有苛政山水  
出壞民舍女謁行后專政多妖女留五十日民流亡太  
白犯之布帛貴兵起天下多寡女留守有女喪軍發辰  
星犯國饑民疾守之天下水有赦南地火北地水又兵  
起布帛貴客星犯兵起女人為亂守之宮人憂諸侯有  
兵江淮不通糴貴彗星犯兵起女為亂出為兵亂有水  
災米鹽貴星孛其分兵起女為亂有奇女來進出入國

有憂王者惡之流星犯天子納美女又曰有貴女下獄  
抵須女女主死乙巳占出入而色黃潤立妃后白為後  
宮妾死雲氣入黃白有嫁女事白為女多病黑為女多  
死赤則婦人多兵死者

按漢永元銅儀以須女為十一度景祐測驗十二度  
距西南星去極百五度在赤道外十四度

十二國十六星在牛女南近九坎各分土居列國之象  
九坎之東一星曰齊齊北二星曰趙趙北一星曰鄭鄭

北一星曰越越東二星曰周周東南北列二星曰秦秦  
南二星曰代代西一星曰晉晉北一星曰韓韓北一星  
曰魏魏西一星曰楚楚南一星曰燕有變動各以其國  
占之陶隱居曰越星在婺女南鄭一星在越北趙二星  
在鄭南周二星在越東楚一星在魏西南燕一星在楚  
南韓一星在晉北晉一星在代北代二星在秦南齊一  
星在燕東

離珠五星在須女北須女之藏府女子之星也又曰主



天子旒珠后夫人環珮去陽旱去陰潦客星犯之後宮有憂

奚仲四星在天津北主帝車之官凡太白熒惑守之為兵祥

天津九星在虛宿北橫河中一日天漢一日天江主四瀆津梁所以度神通四方也一星不備津梁不通明則兵起參差馬貴大則水災移則水溢彗孛犯之津敗道路有賊客星犯橋梁不修守之水道不通船貴流星出

必有使出隨分野占之赤雲氣入為旱黃白天子有德  
令黑為大水色蒼為水為憂出則禍除

敗瓜五星在匏瓜星南主修瓜果之職與匏瓜同占

匏瓜五星

一作瓠瓜

在離珠北天子果園也其西觜星主後

宮不明則后失勢不具或動搖為盜光明則歲豐暗則

果實不登彗孛犯之近臣僭有戮死者客星守之魚鹽

貴山谷多水犯之有游兵不戰蒼白雲氣入之果不可

食青為天子攻城邑黃則天子賜諸侯果黑為天子食

果而致疾

扶筐七星為盛桑之器主勸蠶也一曰供奉后與夫人之親蠶明吉暗凶移徙則女工失業彗星犯將叛流星犯絲綿大貴

按步天歌已上諸星俱屬須女而十二國及奚仲匏瓜敗瓜等星晉志不載隋志有之晉志又以離珠天津屬天市垣扶筐屬太微垣乾象新書以周越齊趙屬牛秦代韓魏燕晉楚鄭屬女武密以離珠匏瓜屬

牛又屬女以奚仲屬危乾象新書以離珠瓠瓜屬牛  
敗瓜屬斗又屬牛以天津西一星屬斗中屬牛東五  
星屬女

虛宿二星為虛堂冢宰之官也主死喪哭泣又主北方  
邑居廟堂祭祀祝禱事宋均曰危上一星高旁兩星下  
似蓋屋也蓋屋之下中無人但空虛似乎殯宮主哭泣  
也明則天下安不明為旱歌斜上下不正享祀不恭動  
將有喪日食其分其邦有喪日暈民饑后妃多喪月食

主刀劔官有憂國有喪月暈有兵謀風起則不成又為  
民饑月犯之宗廟兵動又國憂將死歲星犯民饑守之  
失色天王改服與填星同守水旱不時熒惑犯之流血  
滿野守之為旱民饑軍敗入為火災功成見逐或勾已  
大人戰不利填星犯之有急令行疾有客兵入則有赦  
穀不成人不安守之風雨不時為旱米貴大人欲危宗  
廟有客兵太白犯下多孤寡兵喪出則政急守之臣叛  
君入則大臣下獄辰星犯春秋有水守之亦為水災在

東為春水南為夏水西為秋水北冬有雷雨水客星犯  
糴貴守之兵起近期一年遠則二年有哭泣事出為兵  
喪彗星犯之國凶有叛臣出為野戰流血出入有兵起  
芒彗所指國必亡星孛其宿有哭泣事出則為野戰流  
血國有叛臣流星犯光潤出入則冢宰受賞有赦令色  
黑大臣死入而色青有哭泣事黃白有受賜者出則貴  
人求醫藥雲氣黃入為喜蒼為哭赤火黑水白有幣客  
來

按漢永元銅儀以虛為十度唐開元游儀同舊去極  
百四度今百一度景祐測驗距南星去極百三度在  
赤道外十二度

司命二星在虛北主舉過行罰滅不祥又主死亡逢星  
出司命王者憂疾一曰宜防祇惑

司祿二星在司命北主增年延德又主掌功賞食料官  
爵

司危二星在司祿北主矯失正下又主樓閣臺榭死喪

流亡

司非二星在司危北主司候內外察愆尤主過失乾象  
新書命祿危非八星主天子已下壽命爵祿安危是非  
之事明大為災居常為吉

哭二星在虛南主哭泣死喪月五星彗孛犯之為喪  
泣二星在哭星東與哭同占

天壘城一十三星在泣南園如大錢形若貫索主鬼方  
北邊丁零類所以候興敗存亡熒惑入守夷人犯塞客



星入北方侵赤雲氣掩之北方驚滅有疾疫

離瑜三星在十二國東乾象新書在天壘城南離圭衣也瑜玉飾皆婦人見舅姑衣服也微則後宮儉約明則婦人奢縱客星彗星入之後宮無禁

敗白四星在虛危南兩兩相對主敗亡災害石申曰一星不具民賣甌釜不見民去其鄉五星入除舊布新客星彗星犯之民饑流亡黑氣入主憂

按步天歌已上諸星俱屬虛宿司命司祿司危司非

離瑜敗白晉志不載隋志有之乾象新書以司命司  
祿司危司非屬須女泣星敗白屬危武密書與步天  
歌合

危宿三星在天津東南為天子宗廟祭祀又為天子土  
功又主天府天市架屋受藏之事不明客有誅土功興  
動或暗營宮室有兵事日食陵廟推有大喪有叛臣日  
暈有喪月食大臣憂有喪宮殿圯月暈有兵喪先用兵  
者敗月犯之宮殿陷臣叛主來歲糴貴有大喪歲星犯

守為兵役徭多土功有哭泣事又多盜熒惑犯之有赦  
守之人多疾兵動諸侯謀叛宮中火災守上星人民死  
中星諸侯死下星大臣死各期百日十日守三十日東  
兵起歲旱近臣叛入為兵有變更之令填星守之為旱  
民疾土功興國大戰犯之皇后憂兵喪出入留舍國亡  
地有流血入則大亂賊臣起太白犯之為兵一日無兵  
兵起有兵兵罷五穀不成多火災守之有憂又為旱為  
火舍之有急事辰星犯之大臣誅法官憂國多災守之

臣下叛一云皇后疾兵喪起客星犯有哭泣一日多雨水穀不收入之有土功或三日有赦出則多雨水五穀不登守之國敗民饑彗星犯之下有叛臣兵起出則將軍出國易政大水民饑孛犯國有叛者兵起流星犯之春夏為水災秋冬為口舌入則下謀上抵危北地交兵乙巳占流星出入色黃潤人民安穀熟土功興色黑為水大臣災雲氣入蒼白為土功青為國憂黑為水為喪赤為火白為憂為兵黃出入為喜

按漢永元銅儀以危為十六度唐開元游儀十七度  
舊去極九十七度距南星去極九十八度在赤道外  
七度

虛梁四星在危宿南主園陵寢廟禱祝非人所處故曰  
虛梁一曰宮宅屋幃帳寢太白熒惑犯之為兵彗孛犯  
兵起宗廟改易

天錢十星在北落師門西北主錢帛所聚為軍府藏明  
則庫盈暗為虛太白熒惑守之盜起彗孛犯之庫藏有

賊

墳墓四星在危南主山陵悲慘死喪哭泣大曰墳小曰墓五星守犯為人主哭泣之事

杵三星在人星東一云在白星北主春軍糧不具則民賣甌釜

白四星在杵星下一云在危東杵白不明則民饑星衆則歲樂疏為饑動搖亦為饑杵直下對白則吉不相當則軍糧絕縱則吉橫則荒又白星覆歲饑仰則歲熟彗

星犯之民饑兵起天下急客星守之天下聚會米粟  
蓋屋二星在危宿南九度主治宮室五星犯之兵起彗  
孛犯守兵災尤甚

造父五星在傳舍南一曰在騰蛇北御官也一曰司馬  
或曰伯樂主御營馬廐馬乘轡勒移處兵起馬貴星亡  
馬大貴彗客入之僕御謀主有斬死者一曰兵起守之  
兵動廐馬出

人五星在虛北車府東如人形一曰主萬民柔遠能邇

又曰卧星主夜行以防淫人星亡則有詐作詔者又為婦人之亂星不具王子有憂客彗守犯人多疾疫

車府七星在天津東近河東西列主車府之官又主賓客之館星光明潤澤必有外賓車駕華潔熒惑守之兵動彗客犯之兵車出

鈎九星在造父西河中如鈎狀星直則地動他星守占同一曰主輦輿服飾明則服飾正

按步天歌已上諸星俱屬危宿晉志不載人星車府



隋志有之杵白星晉隋志皆無造父鈎星晉志屬紫

微垣蓋屋虛梁天錢在二十八宿外乾象新書以車

府西四星屬虛東三星屬危武密書以造父屬危又

屬室餘皆與步天歌合按乾象新書又有天網一星

在危宿南入危八度去極百三十二度在赤道外四

十一度晉隋志及諸家星書皆不載止載危室二宿

間與北落師門相近者近世天文乃載此一星在鬼

柳間與外厨天紀相近然新書兩天網雖同在危度

其說不同今姑附于此

營室二星天子之宮一曰玄宮一曰清廟又為軍糧之  
府主土功事一曰室一星為天子宫一星為太廟為王  
者三軍之廩故置羽林以衛又為離宮閣道故有離宮  
六星在其側一曰定室詩曰定之方中也星明國昌不  
明而小祠祀鬼神不享動則有土功事不具憂子孫無  
芒不動天下安日食在室國君憂王者將兵一曰軍絕  
糧士卒亡日暈國憂女主憂黜月食其分有土功歲饑

月暈為水為火為風月犯之為土功有哭泣事歲星犯  
之有急而為兵入天子有赦爵祿及下舍室東民多死  
舍北民憂又曰守之宮中多火災主不安民疫癘惑犯  
歲不登守之有小災為旱為火糴貴逆行守之臣謀叛  
入則創改宮室成勾己者主失宮填星犯為兵守之天  
下不安人主徙宮后夫人憂關梁不通貴人多死久守  
大人惡之以赦解吉逆行女主出入恣留六十日土功  
興太白犯五寸許天子政令不行守則兵大忌之以赦

令解一曰太子后妃有謀若乘守勾已逆行往來主廢  
后妃有大喪宮人恣去室一尺威令不行留六十日將  
死入則有暴兵辰星犯之為水入則后有憂諸侯發動  
於西北客星犯入天子有兵事軍饑將離外兵來出於  
室兵先起者敗彗星出占同或犯之則弱不能戰出入  
犯之則先起兵者勝一曰出室為大水字犯或出入先  
起兵者勝出有小災後宮亂武密曰孛出其分有兵喪  
道藏所載室專主兵流星犯軍乏糧在春夏將軍貶秋

冬水溢乙巳占曰流星出入色黃潤軍糧豐五穀成國  
安民樂雲氣入黃為土功蒼白大人惡之赤為兵民疫  
黑則大人憂

按漢永元銅儀營室十八度唐開元游儀十六度舊  
去極八十五度景祐測驗室十六度距南星去極八  
十五度在赤道外六度

雷電六星在室南明動則雷電作

離宮六星兩兩相對為一坐夾附室宿上星天子之別

宮也主隱藏止息之所動搖為土功不具天子憂太白  
熒惑入兵起犯或勾已環繞為后妃咎彗星犯之有修  
除之事

壘壁陣十二星

一作壘壁

在羽林北羽林之垣壘主天軍營

星明國安移動兵起不見兵盡出將死五星入犯皆主  
兵太白辰星尤甚客星入兵大起將吏憂流星入南色  
青后憂入北諸侯憂色赤黑入東后有謀入西太子憂  
黃白為吉

騰蛇二十二星在室宿北主水蟲居河濱明而微國安  
移向南則旱向北大水彗星犯之水道不通客星犯水  
物不成

土功吏二星在壁宿南一曰在危東北主營造宮室起  
土之官動搖則版築事起

北落師門一星在羽林軍南北宿在北方落者天軍之  
番落也師門猶軍門長安城北門曰北落門象此也主  
非常以候兵星明大安徽小芒角有大兵起歲星犯之

吉熒惑入兵弱不可用客星犯之光芒相及為兵大將  
死守之邊人入塞流星出而色黃天子使出入則天子  
喜出而色赤或犯之皆為兵起雲氣入蒼白為疾疫赤  
為兵黃白喜黑雲氣入邊將死

八魁九星在北落東南主捕張禽獸之官也客彗入多  
盜賊兵起太白熒惑入守占同

天綱一星在北落西南一日在危南主武帳宮舍天子  
游獵所會客彗入為兵起一云義兵



羽林軍四十五星三三而聚散出壘壁之南一曰在營  
室之南東西布列北第一行主天軍軍騎翼衛之象星  
衆則國安稀則兵動羽林中無星則兵盡出天下亂月  
犯之兵起歲星入諸侯悉發兵臣下謀叛必敗伏誅太  
白入兵起填星入大水五星入為兵熒惑太白經過天  
子以兵自守熒惑入而芒赤興兵者亡客星入色黃白  
為喜赤為臣叛流星入南色青后有疾入北諸侯憂入  
東而赤黑后有謀入西太子憂雲氣蒼白入南后有憂

北諸侯憂黑太子諸侯忌之出則禍除黃白吉

斧鉞三星在北落師門東芟刈之具也主斬芻橐以飼牛馬明則牛馬肥膾動搖而暗或不見牛馬死隋志通志皆在八魁西北主行誅拒難斬伐姦謀明大用兵將憂暗則不用移動兵起月入大臣誅歲星犯相誅熒惑犯大臣戮填星入大臣憂太白入將誅客彗犯斧鉞用又占客犯外兵被擒士卒死傷外國降色青憂赤兵黃白吉

按步天歌已上諸星皆屬營室雷電土功吏斧鉞晉志皆不載隋志有之壘壁陣北落師門天綱羽林軍晉志在二十八宿外騰蛇屬天市垣武宐書以騰蛇屬營室又屬壁宿乾象新書以西十六星屬尾屬危東六星屬室羽林軍西六星屬危東三十九星屬室以天綱屬危斧鉞屬奎通占錄又以斧鉞屬壁屬奎說皆不同

壁宿二星主文章天下圖書之祕府明大則王者興道

術行國多君子星失色大小不同王者好武經術不用  
圖書廢星動則有土功日食于壁陽消陰壞男女多傷  
國不用賢日暈名士憂月食其分大臣憂文章士廢民  
多疫月暈為風水其分有憂月犯之國有憂為饑衛地  
有兵歲星犯之水傷五穀久守或凌犯勾巳有兵起熒  
惑犯之衛地憂守之國旱民饑賢不用一占王有大災  
填星犯守圖書興國王壽天下豐國用賢一占物不成  
民多病逆行成勾巳者有土功六十日天下立王太白

犯之一二寸許則諸侯用命守之文武並用一曰有軍  
不戰一曰有兵喪一曰水災多風雨一曰犯之多火災  
辰星犯國有蓋藏保守之事王者刑法急守之近臣憂  
一曰其分有喪有兵姦臣有謀逆行守之橋梁不通客  
星犯之文章士死一曰有喪入為土功有水守之歲多  
風雨舍則牛馬多死彗星犯之為兵為火一曰大水民  
流字犯為兵有火水災流星犯文章廢乙巳占曰若色  
黃白天下文章士用赤雲氣入之為兵黑其下國破黃

則外國貢獻一曰天下有烈士立

按漢永元銅儀東壁二星九度舊去極八十六度景  
祐測驗壁二星九度距南星去極八十五度

天廐十星在東壁之北主馬之官若今驛亭也主傳令  
置驛逐漏馳驚謂其急疾與晷漏競馳也月犯之兵馬  
歸彗星入馬廐火客星入馬出行流星入天下有驚  
霹靂五星在雲雨北一曰在雷電南一曰在土功西主  
陽氣大盛擊碎萬物與五星合有霹靂之應

雲雨四星在雷電東一云在霹靂南主雨澤成萬物星  
明則多雨水辰星守之有大水一占主陰謀殺事孳生  
萬物

鐵鎖五星在天倉西南刈具也主斬芻飼牛馬明則牛  
馬肥微暗則牛馬饑餓

按步天歌壁宿下有鐵鎖五星晉隋志皆不載隋志  
八魁西北三星曰鐵鎖又曰鐵鉞其占與步天歌室  
宿內斧鉞畧同恐即是此誤重出之霹靂五星雲雨

四星晉志無之隋志有之武密書以雲雨屬室宿天  
廡十星晉志屬天市垣其說皆不同

宋史卷五十



宋史卷五十考證

天文志三平道二星在角宿間。角下空一格按此無闕文也

以周衰奏無道鼎淪泗水。按奏字當作秦

由星明則王者明驂星大則兵起。臣召南按晉隋二

志房星明則王者明此文由星係房星之誤

南二星魁天梁也。臣召南按此文直用晉志也隋志

云北二星杓天府廷也南二星魁天梁也相對更為

明整此下文又云南星者魁星也北星杓也此句魁字宜節去史文未檢處也

中二星市也鐵鑕也。臣召南按晉志作鉄鑕是也因

鉄說鉄又因鉄說鐵耳後文凡鉄鑕並說又參宿一曰鉄鉞亦說鐵鉞


又曰土一星主道路。土字係上字之說

一曰三鼓主天子三軍。三鼓晉志作三武

天軍之番落也。晉志作藩落是



宋史卷五十考證



總校官庶吉士臣張能照

校對官庶吉士臣嚴福

謄錄監生臣朱溥

欽定四庫全書薈要

史部  
宋史卷五十一



詳校官編修臣王天祿

欽定四庫全書會要卷五千六百七十九

史部

宋史卷五十一

元中書右丞相總裁托克托等修

天文志第四

天文四 二十八舍下

西方奎宿十六星天之武庫一曰天豕一曰封豕主以兵禁暴又主溝瀆西南大星曰大豕目亦曰大將明動則兵水大出日食魯國凶邊兵起及水旱日暈為兵為

火月食聚飲之臣有憂月暈兵敗糴貴將戮人疾疫月  
犯之其分亂歲星犯之近臣為逆守之蟲為災人民饑  
盜起多獄訟久守北兵降色潤澤大熟守二十日以上  
兵起魯地逆行守之君好兵民流亡熒惑犯之環繞三  
十日以上將相凶大水民流守二十日以上魯地有兵  
動搖進退有赦舍歲大熟留臣下專權多獄訟守百日  
以上多盜填星入犯吳越有兵一曰齊魯一曰兵喪守  
之有貴女執政出入水泉溢太白犯之大水有兵霜殺



物入則外兵入國晝見將相死辰星犯之江河決有兵  
為旱為火守之王者憂兵旱客星犯之有溝瀆事守則  
王者有憂軍敗賊臣在側入之破軍殺將舍留不關去  
人饑出則為謀臣惑天子彗犯為饑為兵喪出則有水  
災星孛之其下兵出民饑國無繼嗣出則西北有兵起  
流星入犯之有溝瀆事破軍殺將乙巳占流星出入色  
黃白光潤文昌武偃赤如火光作聲為弓弩用一曰入  
則有聚眾事赤雲氣入犯為兵黃為天子喜黑則大人

有憂

按漢永元銅儀以奎為十七度唐開元游儀十六度  
舊去極七十六度景祐測驗同

天溷七星在外屏南為天廁養豬之所一曰天之廁溷  
也暗則人不安移徙則憂

土司空一星在奎角一曰天倉主土事凡營城邑浚溝  
洫修隄防則議其利建其功四方小大功課歲盡則奏  
其殿最而行賞罰星大色黃則天下安五星犯之男女

不得耕織彗客犯之水旱民流兵大起土功興客星守  
之有土功哭泣事黃雲氣入土功興移京邑

策一星在王良北天子僕也主執策御流星彗孛客星  
犯之皆為大兵起天子自將于野近之下有謀亂者

附路一星

附一  
作傳

在閣道南旁別道也一曰在王良東主

大僕主禦風雨芒角則車騎在野星亡有道路之變不  
具則兵起太白熒惑入兵起彗孛犯之道路不通客星  
入馬賤蒼白雲氣入太僕有憂赤為太僕誅黃白太僕

受賜黑為太僕死

閣道六星在王良前飛道也從紫宮至河神所乘也一曰主輦閣之道天子游別宮之道也星不見則輦閣不通動搖則宮掖有兵彗孛客星犯之主不安國有喪白雲氣入有急事黑主有疾黃則天子有喜

王良五星在奎北居河中天子奉車御官也其四星曰天駟旁一星曰王良亦曰天馬星動則車騎滿野一曰為天橋主禦風雨水道星不具或客星守之津梁不通

與閣道近有江河之變星明馬賤暗則馬災太白熒惑  
入守為兵彗客犯之為兵喪天下橋梁不通流星犯大  
兵將出青雲氣入犯之王良奉車憂墜車雲氣赤王良  
有斧鑕憂

外屏七星在奎南主障蔽臭穢

軍南門在天大將軍南天大將軍之南門也主誰何出  
入星不明外國叛動搖則兵起明則遠方來貢

按步天歌以上諸星俱屬奎宿以晉志考之王良附

路閣道軍南門策星俱在天市垣別無外屏天溷土  
司空等星隋志有之而武密以王良外屏天溷皆屬  
于壁或以外屏又屬奎乾象新書以王良西一星屬  
壁東四星屬奎外屏西一星屬壁東六星屬奎與步  
天歌各有不合

婁三星為天獄主苑牧犧牲供給郊祀亦為興兵聚眾  
明大則賦歛以時星直則有主執命者就聚國不安日  
食于婁宰相大人當之郊祀神不享日暈有兵大人多

死月食其分后妃憂民饑月暈在春百八十日有赦又  
為糴貴三日內雨解之月犯多畋獵其分憂將死民流  
一曰多冤獄歲星犯之牛多死米賤有赦守之國安一  
曰民多疫六畜貴有兵自罷熒惑犯守為旱為火穀貴  
又曰守二十日以上大臣死星動人多死若逆行入成  
勾巳者國廩災填星犯之天子戒邊境不可遠行將兵  
凶守之穀豐民樂若逆行女謁行留舍于婁外國兵來  
太白犯之有聚眾事守之期三十日有兵民饑辰星犯

之刑罰急多水旱大臣憂王者以赦除之守而芒角動  
搖色赤黑者臣下起兵客星犯為大兵守之五穀不成  
又曰臣惑主專政歲多獄訟環繞三日大赦彗星犯之  
民饑死出則先旱後水穀大貴六畜疾倉庫空又曰國  
有大兵星孛其分為兵為饑流星出犯之有法令清獄  
青赤雲氣入為兵喪黑大水

按漢永元銅儀以婁為十二度唐開元游儀十二度  
舊去極八十度景祐測驗婁宿十二度距中央大星



去極八十度在赤道內十一度

天倉六星在婁宿南倉穀所藏也待邦之用星近而數則歲熟粟聚遠而疏則反是月犯之主發粟五星犯兵起歲饑倉粟出熒惑太白合守軍破將死熒惑入軍轉粟千里近之天下旱太白犯之外國人相食兵起西北辰星守之大水客彗犯之五穀不成客星入歲饑糴貴流星入色赤為兵犯之粟以兵出色黃白歲大稔蒼白雲氣入歲饑赤為兵旱倉廩災黃白歲大熟

右更五星在婁西秦爵名主牧師官亦主禮義星不具  
天下道不通太白熒惑犯守三澤兵起

左更五星在婁東亦秦爵名山虞之官主山澤林藪竹  
木蔬菜之屬亦主仁智占同右更

天大將軍十一星在婁北主武兵中央大星天之大將  
也外小星吏士也動搖則兵起大將出小星動搖或不  
具亦為兵旗直揚者隨所擊勝五星犯守大將憂客星  
守之大將不安軍吏以饑敗流星入大將憂蒼白雲氣

犯之兵多疾赤為兵出

天庾四星在天倉東南主露積占與天倉同

按晉志天倉天庾在二十八宿之外天大將軍屬天  
市垣左更右更惟隋志有之乾象新書以天倉屬奎  
武密亦以屬奎又屬婁步天歌皆屬婁宿

胃宿三星天之厨藏主倉廩五穀府也明則天下和平  
倉廩實民安動則輸運暗則倉空就聚則穀貴民流中  
星衆穀聚星小穀散芒則有兵日食大臣誅一曰乏食

其分多疾穀不實又曰有委輸事日暈穀不熟月食后  
王有憂將亡亦為饑郊祀有咎月暈兵先動者敗姪婦  
多死又曰國主死天多雨或山崩有破軍歲星在暈內  
天子有德令月暈在四孟之月有赦焚惑在暈中為兵  
月犯之鄰國有暴兵天下饑外國憂穀不實民多疾變  
色將軍凶歲星犯之大人憂兵起守則國昌入則國令  
變更天下獄空若逆行五穀不成國無積蓄焚惑犯之  
兵亂倉粟出貴人憂守之旱饑民疫客軍大敗入則改

法令牢獄空進退環繞勾已凌犯及百日以上天下倉庫並空兵起填星犯之大臣為亂守之無蓄積有德令歲穀大貴若逆行守勾已者有兵色赤兵起流血青則有德令辰星犯其分不寧守之有兵國有立侯巫咸曰為旱穀不成有急兵又逆行守之倉空水災客星犯之王者憂倉廩用退行入則有赦守之強臣凌國穀不熟乘之為火舍而不去人饑出其分君有憂彗星犯之兵動臣叛有水災穀不登星孛其分兵起王者惡之流星

犯之倉庫空色赤為火災蒼白雲氣出入犯之以喪糴粟事黑為倉穀散腐青黑為兵黃白倉實

按漢永元銅儀胃宿十五度景祐測驗十四度

天困十三星如乙形在胃南倉廩之屬主給御廩染盛  
星明則豐稔暗則饑月犯之有移粟事五星犯之倉庫  
空虛客彗入倉庫憂水火焚溺青白雲氣入歲饑民流  
七

大陵八星在胃北亦曰積京主大喪也中星繁諸侯喪

民疫兵起月犯之為兵為水旱天下有喪月暈前足大  
赦五星入為水旱兵喪熒惑守之天下有喪客彗入民  
疫流星出犯之其下有積尸蒼白雲氣犯之天下兵喪  
赤則人多戰死

積尸一星在大陵中明則有大喪死人如山月犯之有  
叛臣五星犯之天下大疾客彗犯有大喪蒼色雲氣入  
犯之人多死黑為疫

天船九星在大陵北河之中天之船也主通濟利涉石

申曰不在漢中津河不通明則天下安不明及移徙天下兵喪日犯之百川流溢津梁不通五星犯之水溢民移居彗星犯之為大水客星犯為水為兵青雲氣入天子憂不可御船赤為兵船用黃白天子喜

天廩四星在昴宿南一曰天廩主蓄黍稷以供享祀春秋所謂御廩此之象也又主賞功掌九穀之要明則國實歲豐移則國虛黑而稀則粟腐敗月犯之穀貴五星犯之歲饑客星犯倉庫空虛流星入色青為憂赤為旱



為火黃白天下熟青雲氣入蝗饑民流赤為旱黑為水黃則歲稔

積水一星在天船中候水災也明動上行舟船用熒惑犯有水

按晉志大陵積尸天船積水俱屬天市垣天困天廩在二十八宿之外武密以天困大陵屬婁又屬胃天船屬胃又屬昴乾象新書天困五星屬婁餘星屬胃大陵西三星屬婁東五星屬胃與步天歌互有不同

昴宿七星天之耳也主西方及獄事又為旄頭北星也  
又主喪昴畢間為天街天子出旄頭罕畢以前驅此其  
義也黃道所經明則天下牢獄平六星皆明與大星等  
為大水七星皆黃兵大起一星亡為兵喪搖動有大臣  
下獄及有白衣之會大而數盡動若跳躍者北兵大起  
一星獨跳躍而動北兵欲犯邊日食王者疾宗姓自立  
又占邊兵起日暈陰國失地北主憂趙地凶又云大饑  
月食大臣誅女主憂為饑邊兵起將死北地叛月歲三

暈弓弩貴民饑暈在正月上旬有赦犯之為饑北主憂  
天子破北兵變色民流國亡下有暴兵有赦出昴北天  
下有福乘之法令峻大水穀不登歲星犯之獄空乘之  
陰國有兵北主憂守之主急刑罰獄空一曰臣下獄有  
解者守其北有德令又曰水物不成久守大臣坐法民  
饑留守破軍殺將熒惑犯守為兵為旱饑守東齊楚越  
地有兵守南荆楚有兵西則兵起秦鄭北則兵起燕趙  
又為貴人多死北地不寧入則有喜有赦天下無兵守

而環繞勾已為赦久守糴貴填星犯或出入守之北地  
為亂有土功五穀不成水火為災民疫又為女主失勢  
入則地動水溢宗廟壞留則大將出征太白入犯之大  
赦在東六畜傷在西六月有兵又曰守之北兵動將下  
獄晝見邊兵起出入留在舍南為男喪北為女喪辰星  
犯北主憂守之穀不成民饑久守為水為兵客星犯貴  
人有急北兵大敗讒人在內守之臣叛主兵起入則其  
分有喪彗星犯之大臣為亂出則邊兵起有赦星孛其

分臣下亂有邊兵大臣誅流星出入犯之外兵起乙巳  
占流星入北方來朝出則天子有赦令恤民蒼赤雲氣  
犯之民疫黑則北主憂青為水為兵青白人多喪黃則  
有喜

按漢永元銅儀昴宿十二度唐開元游儀十一度舊  
去極七十四度景祐測驗昴宿十一度距西南星去  
極七十一度

芻豪六星在天苑西一曰在天困南主積豪之屬一曰

天積天子之藏府星明則芻橐貴星盛則百庫之藏存  
無星則百庫之藏散月犯之財寶出辰星熒惑犯之芻  
橐有焚溺之患赤雲氣犯之為火黃為喜

天陰五星主從天子弋獵之臣不明則為吉明則禁言  
泄

天河一星一作大河在天廡星北晉志在天高星西主察山

林妖變五星客彗犯之主妖言滿路

卷舌六星在昴北主樞機智謀一曰主口舌語以知讒

佞曲而靜則賢人升直而動多讒人兵起天下有口舌之害徙出漢外則天下多妄說星繁人多死月犯之天下多喪五星犯佞人在側彗客犯之侍臣憂

天苑十六星在昴畢南如環狀天子養禽獸之苑明則禽獸牛馬盈不明則多瘠死不具有斬刈事五星犯之兵起客彗犯為兵獸多死流星入色黑禽獸多死黃則蕃息雲氣占同

天讒一星在卷舌中主巫醫暗則為吉明盛人君納佞

言

月一星在昴宿東南蟾蜍也主日月之應女主臣下之象又主死喪之事明大則女主大專太白熒惑守之臣下起兵為亂彗客犯之大臣黜女主憂

礪石四星在五車星西主百工磨礪鋒刀亦主侯伺明則兵起常則吉熒惑入邊兵起守之諸侯發兵客星守之為兵

按晉志天河卷舌天讒俱屬天市垣天苑在二十八



宿之外芻橐天陰月礪石晉志不載隋史有之武密  
又以芻橐屬胃卷舌屬胃又屬昴乾象新書以芻橐  
屬婁卷舌西三星屬胃東三星屬昴天苑西八星屬  
胃南八星屬昴步天歌以上諸星皆屬昴宿互有不  
合

畢宿八星主邊兵弋獵其大星曰天高一曰邊將主四  
夷之尉也天官書曰畢為旱車明大則遠人來朝天下  
安失色邊兵亂一星亡為兵喪動搖則邊兵起移徙天

下獄亂就聚則法令酷日食邊王死軍自殺其主遠國  
有謀亂日暈有邊兵下則北主憂又占有風雨月食有  
赦趙分有兵或趙君憂月暈兵亂饑喪暈三重邊有叛  
者七日内風雨解之又為陰國有憂天下赦犯畢大星  
下犯上大將死陰國憂入畢口多雨穿畢歲饑盜起失  
行離于畢則雨居中女主憂又曰犯北則陰國憂南則  
陽國憂歲星犯之冬多風雨又曰為水入畢口邊兵起  
民饑有赦守三十日客兵起出陽為旱陰為水熒惑犯

右角大戰左角小戰入則邊兵憂守之為饑有赦成勾  
已環繞大赦一曰入畢中有兵兵罷又曰守之有畋獵  
事北主憂天下道路不通入畢口有赦逆行至昴為死  
喪已去還守貴臣憂舍畢口趙國憂填星犯之兵起西  
北不戰守之兵有降軍有赦一曰土功徭役煩兵起入  
則地震水溢守畢口大人當之出入留舍其野兵起客  
軍死太白犯右角戰敗將死入畢口將相為亂大赦國  
易政令諸侯起兵為水五穀不成貫畢倉廩空四國兵

起辰星犯之邊地災入畢口國易政守之水溢民病物  
不成邊兵起守畢口人為亂客星犯之大人憂無兵兵  
起有兵兵罷入則多獄事守之為饑邊兵起出為車馬  
急行彗星犯之北地為亂人民憂星孛其分土功興多  
徭役色蒼為饑破軍黃則女為亂白為兵喪黑為水流  
星犯之邊兵大戰赤色貫之戎兵大至入而復出為赦  
入而黃白有光外人入貢蒼白雲氣入歲不收赤為兵  
旱為火黃白天子有喜

按漢永元銅儀畢十六度舊去極七十八度景祐測  
驗畢宿十七度距畢口北星去極七十七度

天節八星在畢附耳南主使臣持節宣威四方明大則  
使忠不明則奉使無狀熒惑守之臣有謀逆或使臣死  
太白守之大將出客彗犯之法令不行客星守持節臣  
有憂

九州殊口九星在天節南下曉方俗之官通重譯者也  
常以十一月候之亡一星一國憂二星以上天下亂兵

起太白熒惑守之亦為兵客星入民憂水負海國不安  
有兵

附耳一星在畢下主聽得失伺愆邪察不祥也星盛則  
中國微有盜賊邊候警外國反動搖則讒臣在君側歲  
星犯之有兵將相喪太白犯之佞臣在側

九旂九星在玉井西南一曰在九州殊口東南北列主  
天下兵旗又曰天子之旗也太白熒惑犯之兵騎滿野  
客星犯諸侯兵起禽獸多疾

天街二星在昴畢間一曰在畢宿北為陰陽之所分大象占近月星西街南為華夏街北為外邦又曰三光之道主伺候闕梁中外之境明則王道正月犯天街中為中平天下安寧街外為漏泄讒夫當事民不得志不由天街主政令不行月暈其宿闕梁不通熒惑守之道路絕久守國絕禮歲星居之色赤為殃或大旱太白守之兵塞道路八蠻旄頭滅一曰民饑

天高四星在坐旗西乾象新書在畢口東北臺榭之高

主望八方雲霧氛氣今仰觀臺也不見為主失禮守常則吉微暗陰陽不和月五星犯之則水旱不時乘之外臣誅月暈不出六月有喪熒惑入十日為小赦留三十日大赦客彗守之大旱蒼白雲氣犯亦然

諸王六星在五車南主察諸侯存亡明則下附上不明則下叛不見宗廟危四方兵起熒惑入之諸王妃恣為下所謀守之下不信上太白熒惑犯諸王當之一曰宗臣憂客彗守諸侯黜



五車五星三柱九星在畢宿北五帝坐也又五帝之車  
舍也主天子兵起又主五穀豐耗一車主蕒麻一車主  
麥一車主豆一車主黍一車主稻米西北大星曰天庫  
主太白秦分及雍州主豆東北一星曰天獄主辰星燕  
趙分及幽冀主稻東南一星曰天倉主歲星魯分徐州  
衛分并州主麻次東南一星曰司空主填星楚分荊州  
主黍粟次西南一星曰卿主熒惑魏分益州主麥天文  
錄曰太白其神令尉辰星其神風伯歲星其神雨師熒

惑其神豐隆填星其神雷公此五車有變各以所主占之三柱一曰天淵一曰天休一曰天旂欲其均明濶狹有常星繁則兵大起石申曰天庫星中河而見天下多死人河津絕又曰天子得靈臺之禮則五車三柱均明有常天旂星不見則大風折木天休動則四國叛一柱出或不見兵半出三柱盡出及不見兵亦盡出柱外出一月穀貴三倍出二月三月以次倍貴外出不盡兩間主大水月犯天庫兵起道不通犯天淵貴人死臣踰主

月暈女主惡之在正月為赦暈一車赦小罪五車俱暈  
赦殊罪四七十月暈之為水暈十一月十二月穀貴五  
星犯為旱喪犯庫星為兵起歲星入之糴貴熒惑入之  
為火或與歲星占同填星入天庫為兵為喪舍中央為  
大旱燕代之地當之舍東北畜蕃帛錢舍西北天下安  
太白入之兵大起守五車中國兵所向懼伏舍西北為  
疾疫牛馬死應酒泉分辰星入舍為水犯之兵以水潦  
起客星犯則入勞庚寅日候近之為金車主兵甲寅日

候近之為木車主櫛增價戊寅日候近之為土車主土  
功丙寅日候近之為火車主旱壬寅日候近之為水車  
主水溢入之色青為憂赤為兵守天淵有大水守天休  
左為兵右為喪黃為吉彗孛犯之兵起民流流星入甲  
子曰主粟丙午日主麥戊寅日主豆庚申日主蕡壬戌  
日主黍各以其日占之而粟麥等價增白雲氣入民不  
安赤為兵起

天潢五星在五車中主河梁津渡星不見則津渡不通

月入天潢兵起五星失度留守之皆為兵熒惑填星入之為大旱為火熒惑舍之牛馬疫為兵辰星出天潢有赦客星入為兵留守則有水害蒼白或黑雲氣入為喪赤為兵白則天子有喜

咸池三星在天潢南主陂澤池沼魚鼈鳧鴈明大則龍見虎狼為害星不見河道不通月入為暴兵五星入為兵為旱失忠臣君易政守之為饑為兵客星入天下大水流星入為喪出則兵起雲氣入色蒼白魚多死赤為

旱白為神魚見黑為大水

參旗九星一曰天旗一曰天弓司弓弩候變禦難星如  
弓張則兵起明則邊寇動暗為吉又曰天弓不具天下  
有兵五星犯之兵起熒惑守之下謀上諸侯起兵一曰  
有邊兵太白守之兵亂客星守天下憂流星入北地兵  
起雲氣犯之色青入自西北兵來期三年

天關一星在五車南亦曰天門日月之所行主邊方主  
關閉星芒角為兵不與五車合大將出月歲三暈有赦

犯之有亂臣更法五星守之貴人多死歲星熒惑守之  
臣謀主為水為饑太白熒惑守之大赦闕梁有兵太白  
入則大亂填星守王者壅蔽犯之臣謀主太白失行兵  
起客星犯之民多疾闕市不通又曰諸侯不通民相攻  
客星入多盜流星犯之天下有急闕梁不通民憂多盜  
黃雲氣犯四方入貢

天園十三星在天苑南植菜果之處曲而鈎菜果熟白  
雲氣犯之兵起

按步天歌以上諸星皆屬畢宿武密書以天節屬昴  
參旗天關五車三柱皆屬觜與步天歌不同乾象新  
書以天節參旗皆屬畢天園西八星屬昴東五星亦  
屬畢五車北西南三大星屬畢東二星及三柱屬參  
說皆不同今皆存之

觜觶三星為三軍之候行軍之藏府主葆旅收斂萬物  
明則軍糧足將得勢動則盜賊行葆旅起暗則不可用  
兵日食臣犯主戒在將臣暈及三重其下穀不登民疫



五重大赦期六十日月食為旱大將憂有叛主者正月  
月暈有赦外軍不勝大將憂偏裨有死者歲星犯之其  
分兵起守則農夫失業后有憂丁壯多暴死下有叛者  
民多疾疫入則多盜天時不和國君誅伐不當則逆行  
熒惑犯之其分有叛者為旱為火為兵起為糴貴與此  
觜合趙分相憂入則其下有兵填星入犯為兵為土功  
其分失地女主恣則填星逆行而色黃太白犯之兵起  
守之其分易令大臣叛物不成民疫辰星犯之不可舉

兵一曰趙地水有叛者守之趙分饑客星出入其宿青為憂赤為兵黑為水白為喪黃白為吉彗星犯之兵起出入其分失地民流星孛之為兵亂軍破其色與客星同占流星入犯之有叛者有破軍雲氣犯之赤為兵蒼白為兵憂黑趙地大人有憂色黃有神寶入

按漢永元銅儀唐開元游儀皆以觜觿為三度舊去極八十四度景祐測驗觜宿三星一度距西南星去極八十四度在赤道內七度

坐旗九星在司恠西北君臣設位之表也星明則國有禮

司恠四星在井鉞星前主候天地日月星辰變異鳥獸草木之妖明王聞災修德保福星不成行列宮中及天下多恠

按步天歌坐旗司恠俱屬觜宿武密書及乾象新書皆屬於參

參宿十星一曰參伐一曰天市一曰大辰一曰鐵鉞主

斬刈萬物以助陰氣又為天獄主殺秉威行罰也又主  
權衡所以平理也又主邊城為九譯故不欲其動參為  
白獸之體其中三星橫列者三將也東北曰左肩主左  
將西北曰右肩主右將東南曰左足主後將軍西南曰  
右足主偏將軍參應七將中央三小星曰伐天之都尉  
主鮮卑外國不欲其明七將皆明大天下兵精王道缺  
則芒角張伐星明與參等大臣有謀兵起失色軍散敗  
芒角動邊有急兵起有斬伐之事星移客伐主肩細微

天下兵弱左足入玉井中兵起秦有大水有喪山石為怪星差戾王臣貳左股星亡東南不可舉兵左股則主西北又曰參足移北為進將出有功徙南為退將軍失勢三星䟽法令急日食大臣憂臣下相殘陰國強日暈有來和親者一曰大饑月食其度為兵臣下有謀貴臣誅其分大饑外兵大將死天下更令月暈將死人殃亂戰不利月犯貴臣憂兵起民饑犯參伐偏將死歲星犯之水旱不時大疫為饑守之兵起民疫入則天下更政

熒惑犯之為兵為內亂秦燕地凶守之為旱為兵四方  
不寧逆行入則大饑填星犯之有叛臣守之其下國亡  
姦臣謀逆一云有喪后夫人當之逆行留守兵起太白  
犯之天下發兵守之大人為亂國易政邊民大戰辰星  
犯之為水為兵貴臣黜辰星與參出西方為旱大臣誅  
逆守之兵起客星入犯之國內有斬刈事守之邊州失  
地環繞者邊將有斬刈事彗星犯之邊兵敗君亡遠期  
三年貫之色白為兵喪星孛于參君臣俱憂國兵敗流

星入犯之先起兵者亡乙巳占曰流星出而光潤邊安  
有赦獄空青雲氣入犯之天子起邊城蒼白為臣亂赤  
為內兵黃色潤澤大將受賜黑為水災大臣憂白雲氣  
出貫之將死天子疾

按漢永元銅儀參八度舊去極九十四度景祐測驗  
參宿十星十度右足入畢十三度

玉井四星在參左足下主水泉以給庖厨動搖為憂客  
星入為水為喪國失地出則國得地一云將出流星入

為大水雲氣入而色青井水不可食

屏二星一作天屏在玉井南一云在參右足星不具人多疾不明大人寢疾星亡主多病月五星犯之為水客星出于屏亦為大人有疾彗星犯之水旱不時

軍井四星在玉井東南軍營之井主給師濟疲乏月犯芻橐財寶出熒惑入為水兵多死太白入兵動民不安客星入憂水害

廁四星在屏星東一曰在參右脚南主潤色黃為吉歲



豐青黑人主腰下有疾星不具則貴人多病客星入為穀貴彗孛入歲饑青雲氣入為兵黑為憂黃則天子有喜

天尿一星在天厠南色黃則年豐凡變色為蝗為水旱為霜殺物常以秋分候之星亡不見天下荒星微民多流

按步天歌玉井軍井厠各四星屏二星天尿一星俱屬參宿晉志玉井在參左足武密書屬觜乾象新書

屬畢軍井晉志在玉井南武密亦屬觜乾象新書亦屬畢唐開元游儀在玉井東南屏廁天尿晉志皆不載隋志屏在玉井南開元游儀在觜隋志廁在屏東尿在廁南乾象新書皆屬參與步天歌互有不合

南方東井八星天之南門黃道所經七曜常行其中為天之亭候主水衡事法令所取平也武密占曰井中為三光正道五緯留守若經之皆為天下無道不欲明明則大水又占曰用法平井宿明鉞一星附井宿前主伺

奢淫而斬之明大與井宿齊則用鉞於大臣月宿其分  
有風雨日食秦地旱民流有不臣者暈則多風雨有青  
赤氣在日為冠天子立侯王月食有內亂大臣黜后不  
安五穀不登分有兵喪月暈為旱為兵為民流國有憂  
一曰有赦陰陽不和則暈暈及三重在三月為大水在  
十二月日壬癸為大赦月犯之將死于兵水官黜刑不  
平犯井鉞大臣誅有水事歲星犯之主急法多獄訟水  
溢將軍惡之犯井鉞近臣為亂兵起逆行入井川流壅

塞熒惑犯之兵先起者殃又曰天子以水敗入守經旬  
下有兵貴人不安守三十日成勾己角動色赤黑貴人  
當之百川溢兵起填星入犯之兵起東北大臣憂入井  
鉞王者惡之在觜而去東井其下亡地太白犯之咎在  
將久守其分君失政臣為亂辰星犯之星進則兵進退  
則兵退刑法平又曰北兵起歲惡芒角動搖色赤黑為  
水為兵起客星犯之穀不登大臣誅有土功小兒妖言  
彗星犯之民讒言國失政一曰大臣誅其分兵災流星

犯之在春夏則秦地謀叛在秋冬則宮中有憂乙巳占  
流星色黃潤國安赤黑秦分民流水災蒼黑雲氣入犯  
之民有疾疫黃白潤澤有客來言水澤事黑氣入為大  
水常以正月朔日入時候之井宿上有雲歲多水潦

按漢永元銅儀井宿三十度唐開元游儀三十三度  
去極七十度景祐測驗亦三十三度距西北景去極  
六十九度

五諸侯五星在東井北主斷疑刺舉戒不虞理陰陽察

得失亦曰主帝心一曰帝師二曰帝友三曰三公四曰  
博士五曰太史五者常為帝定疑議星明大潤澤則天  
下治五禮備則光明不相侵陵暗則貴人謀上芒角禍  
在中歲星犯之兵起三年熒惑犯之大臣叛不成太白  
犯之諸侯興兵亡國經天晝見則諸侯受誅客星犯王  
室亂諸侯亡地秦國殃守之諸侯親屬失位彗孛犯之  
執法臣誅又曰貴臣當之期一年雲氣犯之色蒼白諸  
侯有喪不則臣有誅戮天下有大水

積水一星在北河西北所以供酒食之正也不見為災  
歲星犯之水物不成魚鹽貴民饑熒惑犯之為兵為水  
辰星犯之為水旱客星犯之兵起大水大臣憂期一年  
蒼白雲氣入犯之天下有水

積薪一星在積水東北供庖厨之正也星不明五穀不  
登熒惑犯之為旱為兵為火災客星守之薪貴赤雲氣  
入犯之為水災

南河三星與北河夾東井一曰天之闕門也主闕梁南

河曰南戍一曰南宮一曰陽門一曰越門一曰權星主  
火兩河戍間日月五星之常道也河戍動搖中國兵起  
河星不具則路不通水泛溢月出入兩河間中道民安  
歲美無兵出中道之南君惡之大臣不附星明為吉昏  
昧動搖則邊兵起遠人叛主憂月犯之為中邦憂一曰  
為兵為喪為旱為疫行西南為兵旱入南戍則民疫暈  
則為土功乘之四方兵起經南戍南則為刑罰失歲星  
犯之北主憂熒惑犯兩河為兵守三十日以上川溢守



南河穀不登女主憂守南戍西果不成在東則有攻戰  
填星乘南河為旱民憂守之為兵道不通太白舍三十  
日川溢一曰有姦謀守兩河為兵起客星守之為旱為  
疫彗孛出為兵守為旱流星出為兵喪邊戍有憂蒼白  
雲氣入之河道不通出而色赤天子兵向諸侯黃氣入  
之有德令出為災

北河亦三星北河曰北戍一曰北宮一曰陰門一曰胡  
門一曰衡星主水五星出入留守之為兵起犯之為女

喪乘之為北主憂歲星入北戍大臣誅熒惑從西入北  
戍六十日有喪從東入九十日有兵一曰出北戍北守  
之邊將有不請于上而用兵外國者勝填星守之兵起  
六十日內有赦一曰有土功若守戍西五穀不實太白  
舍北戍三十日為女喪有內謀守陰門不出百日天下  
兵悉起辰星守之外兵起邊臣有謀留止則兵起四方  
客星入犯之有喪於外姦人在中入自東兵起期九十  
日入自西有喪期六十日守之為大水流星經兩河間

天下有難入為北兵入中國闕梁不通雲氣蒼白入犯之邊有兵疾疫又為北主憂

四瀆四星在東井南垣之東江河淮濟之精也明大則百川決

水位四星在積薪東一曰在東井東北主水衡歲星犯之為大水一曰出南為旱熒惑守之田不治客星犯之水道不通伏兵在水中一曰客星若水火守犯之百川流溢彗孛出為大水為兵穀不成流星入之天下有水

穀敗民饑赤雲氣入為旱饑

天樽三星在五諸侯南一曰在東井北樽器也主盛饉  
粥以給貧餒明為豐暗則歲惡

闕丘二星在南河南天子雙闕諸侯兩觀也太白熒惑  
守之兵戰闕下

軍市十三星狀如天錢天軍貿易之市有無相通也中  
星衆則軍餘糧小則軍饑月入為兵起主不安五星守  
之軍糧絕客星入則刺客起將離卒亡流星出為大將

出

野鷄一星在軍市中主變恠出市外天下有兵守靜為吉芒角為凶

狼一星在東井東南為野將主侵掠色有常不欲動也芒角動搖則兵起明盛兵器貴移位人相食色黃白為凶赤為兵月犯之有兵不戰一曰有水事月食在狼外國有謀五星犯之兵大起多盜彗孛犯之盜起客星守之色黃潤為喜黑則有憂赤雲氣入有兵

弧矢九星在狼星東南天弓也主行陰謀以備盜常屬  
矢以向狼武密曰天弓張則北兵起又曰天下盡兵動  
搖明大則多盜矢不直狼為多盜引滿則天下盡為盜  
月入弧矢臣逾主月暈其宿兵大起客星入南夷來降  
若舍其分秋雨雪穀不成守之外國饑出入之為兵出  
入流星入北兵起屠城殺將赤雲氣入之民驚一曰北  
兵入中國

老人一星在弧矢南一名南極常以秋分之旦見于丙

候之南郊春分之夕沒于丁見則治平天子壽昌不見  
則兵起歲荒君憂客星入為民疫一曰兵起老者憂流  
星犯之老人多疾一曰兵起白雲氣入之國當絕

丈人二星在軍市西南主壽考悼耄矜寡以哀窮人星  
亡人臣不得自通

子二星在丈人東主侍丈人側不見為災

孫二星在子星東以天孫侍丈人側相扶而居以示孝  
慈不見為災居常為無咎

水府四星在東井西南水官也主隄塘道路梁溝以設隄防之備熒惑入之有謀臣辰星入為水客星入天下大流星入色青所主之邑大水赤為旱

按步天歌自五諸侯至水府常星一十八坐俱屬東井武密書以丈人二星子孫各一星屬牛宿乾象新書以丈人與子屬參孫屬井又以水府四星亦屬參武密以水府屬井餘皆與步天歌合

輿鬼五星主觀察姦謀天目也東北星主積馬東南星



主積兵西南星主積布帛西北星主積金玉隨變占之  
中央星為積尸主死喪祠祀一曰鐵鑕主誅斬星明大  
穀不成不明民散鑕欲其忽忽不明明則兵起大臣誅  
動而光賦重役煩民懷嗟怨日食國不安有大喪貴人  
憂暈則其分有兵大臣有誅廢者月食貴臣皇后憂期  
一年暈為旱為赦月犯之秦分君憂一曰軍將死貴臣  
女主憂民疫歲星犯之穀傷民饑君不聽事犯鬼鑕執  
法臣誅熒惑犯之忠臣誅一曰兵起后失勢入則后及

相憂一曰賊在君側有兵喪勾已國有赦留守十日諸  
侯當之二十日太子當之勾已環繞天子失廟填星犯  
之大臣女主憂守之憂在後宮為旱為土功入鑿王者  
惡之犯積尸在陽為君在陰為后左為太子右為貴臣  
隨所守惡之太白入犯之為兵亂臣在內一曰將有誅  
貫之而怒下有叛臣久守之下有兵為旱為火萬物不  
成辰星犯之五穀不登守為有喪憂在貴人客星犯之  
國有自立者敗一曰多土功入之有詛盟祠鬼事彗星

犯之兵起國不安星孛其下有喪兵起宜修德禳之流  
星犯鬼鑽有戮死者入則四國來貢白雲氣入有疾疫  
黑后有疾憂赤為旱黃為土功入犯積尸貴臣有憂青  
為病

按漢永元銅儀輿鬼四度舊去極六十八度景祐測  
驗輿鬼三度距西南星去極六十八度

燿四星在鬼宿西北一曰在軒轅西主烽火備邊亭之  
警急以不明為安明大則邊有警赤雲氣入天下烽火

皆動

天狗七星在狼星北主守財動移為兵為饑多寇盜有亂兵填星守之人相食客彗守之則羣盜起

外厨六星為天子之外厨主烹宰以供宗廟占與天厨同

積尸氣一星在鬼宿中孛孛然入鬼一度半去極六十九度在赤道內二十二度主死喪祠祀

天紀一星在外厨南主禽獸之齒太白熒惑守犯之禽

獸死民不安客星守之則政隳

天社六星在弧矢南昔共工氏之勾龍能平水土故祀之以配社其精上為星明則社稷安不明動搖則下謀上太白熒惑犯之社稷不安客星入有祀事于國內出則有祀事于國外

按晉志燿四星屬天市垣天狗七星在七星北武密以天狗屬牛宿又屬輿鬼乾象新書屬井外厨六星晉志在柳宿南武密書亦屬柳乾象新書與步天歌

皆屬輿鬼天紀一星武密書及乾象新書皆屬柳惟步天歌屬鬼宿天社六星武密書屬井又屬鬼乾象新書以西一星屬井中一星屬鬼末一星屬柳今從步天歌以諸星俱屬輿鬼而備存衆說

柳宿八星天之厨宰也主尚食和滋味又主雷雨爾雅曰味謂之柳柳鷄火也又主木功一曰天庫又為鳥喙主草木明則大臣謹重國家厨食具開張則人饑死亡則都邑振動直則為兵日食宮室不安王者惡之厨官

橋道隄防有憂日暈飛鳥多死五穀不成三抱而戴者  
君有喜月食宮室不安大臣憂月暈林苑有兵天下有  
土功厨獄官憂又為兵為饑為旱疫歲星犯之國多義  
兵熒惑犯之色赤大而芒角其下君死一曰宮中憂火  
災守之有兵逆臣在側逆行守之王不寧填星犯守君  
臣和天下喜石申曰天子戒飲食之官出入留舍有急  
令太白犯之有急兵逆行勾己臣謀主晝見為兵辰星  
犯之民相仇歲旱君戒在酒食客星犯之咎在周國守

則布帛魚鹽貴色蒼白殺邊地諸侯彗星犯之大臣誅  
為兵為喪星孛于柳南夷叛甘德曰為兵為喪流星出  
犯之周分憂色黃為喜入則王者內有火災乙巳占出  
則宗廟有喜賢人用入為天厨官有憂木功廢赤雲氣  
入為火黃為赦黃白為天子有喜起宮室

按漢永元銅儀以柳為十四度唐開元游儀十五度  
舊去極七十七度景祐測驗柳八星一十五度距西  
頭第三星去極八十三度



酒旗三星在軒轅右角南酒官之旗也主宴享飲食星不具則天下有大喪帝王宴飲沉昏非禮以酒亡國明則宴樂謹五星守之天下大酺有酒肉賜宗室熒惑犯之飲食失度太白犯之三公九卿有謀客彗犯主以酒過為相所害赤雲氣入君以酒失

按晉志酒旗在天市垣步天歌以酒旗屬柳宿以通占鏡考之亦屬柳又屬七星乾象新書亦屬七星與步天歌不同今並存之

七星七星一名天都主衣裳文繡又主急兵故星明王道昌暗則賢良去天下空動則兵起離則易政蓋天曰七星為朱雀頸頸者文明之粹羽儀所承日食其宿主不安刑在門戶之神又曰文章士受誅其分兵起臣為亂日暈周邦君憂青色抱而順在兵為東軍吉月食后及大臣有憂又為歲饑民流其國更政暈其地旱獄官凶歲星犯之主憂兵五穀多傷熒惑犯之橋梁不通逆行則地動為火災出入留舍其國失地水決填星犯守

世治平王道興后夫人喜太白犯之兵暴起大臣為亂  
經天防詐偽辰星犯之賊臣在側守則其分有憂萬物  
不成兵從中起貴臣有罪民疫流亡客星犯之為兵荆  
州占云河水決民流彗犯有亂兵起貴臣戮武密曰彗  
星出七星狀如杵為兵星孛于星有亂兵起宮殿貴臣  
戮大臣相譖流星犯之為兵憂又曰入則有急使來乙  
巳占流星入庫宮有喜錦繡進女工用蒼白雲氣入貴  
人憂出則天子用急使赤入為兵黑為賢士死黃則遠

人來貢白為天子遣使賜諸侯帛

按景祐測驗七星七度距大星去極九十七度

軒轅十七星在七星北后妃之主士職也一曰東陵一曰權星主雷雨之神南大星女主也次北一星夫人也屏也上將也次北一星妃也次將也其次諸星皆次妃之屬也女主南小星女御也左一星少民后宗也右一星太民太后宗也欲其色黃小而明武密曰后妃後宮之象陰陽交合感為雷激為電和為雨怒為風亂為霧

凝為霜散為露聚為雲氣立為虹蜺離為背璫分為抱  
珥此二十四變皆權主之微細則皇后不安黑則憂在  
大人移徙則民流東西角大張而振后族敗月入之女  
主失勢或火災犯左右角大臣以罪免中犯乘守太民  
為饑太后宗有罪守少民小有饑女主失勢守御女有  
憂月暈女主有喪月五星凌犯環繞乘守皆為女主有  
禍月食女主憂歲星犯之女主失勢一曰大臣當之乘  
守太民為大饑太后宗黜中犯乘守少民為小饑後宮

有黜者熒惑犯守勾已后妃離德妃御女天子僕妾憂  
犯太民少民憂在后宗守之宮中有戮者填星行其中  
女主失勢有喪太白犯之皇后失勢客星犯之近臣謀  
滅宗族彗孛犯女主為寇一曰兵起流星入之後宮多  
讒亂乙巳占流星出之后有中使出一曰天子有子孫  
喜

天稷五星在七星南農正也取百穀之長以為號明則  
歲豐暗或不具為饑移徙天下荒歉客星入之有祠事

于内出有祠事于國外

天相三星在七星北一曰在酒旗南丞相大臣之象武  
密曰占與相星同五星犯守之后妃將相憂彗客犯之  
大臣誅雲氣入黃為大臣喜黑為將憂

内平四星在三臺南一曰在中臺南執法平罪之官明  
則刑罰平

按軒轅十七星晉志在七星北而列于天市垣武密  
以軒轅屬七星又屬柳乾象新書以西八星屬柳中

屬七星末屬張天稷五星晉志作七星南武密亦以  
天稷屬七星又屬柳乾象新書以西二星屬柳餘屬  
七星天相三星晉志在天市垣武密書屬七星乾象  
新書屬軫宿內平四星晉志在天市垣武密書屬柳  
乾象新書屬張步天歌屬七星諸說各不同今並存  
之

張宿六星主珍寶宗廟所用及衣服又主天厨飲食賞  
賚之事明則王行五禮得天下之中動則賞賚不明王



者子孫多疾移徙則天下有逆就聚則有兵日食為王者失禮掌御饌者憂甘德曰后失勢貴臣憂期七十日暈及有黃氣抱日主功臣効忠又曰財寶大臣黜將相憂月食其分饑臣失勢皇后有憂暈為水災陳卓曰五穀魚鹽貴巫咸曰后妃惡之宮中疫月犯之將相死其國憂歲星入犯之天子有慶賀事守之國大豐君臣同心三十日不出天下安寧其國升平熒惑犯之功臣當封入則為兵起又曰色如四時休王其分貴人安社稷

無虞又曰熒惑春守諸侯叛逆行守之為地動為火災  
又曰將軍驚土功作又曰會則不可用兵填星犯之為  
女主飲宴過度或宮女失禮入為兵出則其分失地守  
之有土功太白犯之國憂守之其國兵謀不成石申曰  
國易政舍留其國兵起辰星犯守五穀不成兵起大水  
貴臣負國民疫多訟芒角臣傷其君入為火災出則有  
叛臣容星犯之天子以酒為憂守之周楚之國有隱士  
出入于張兵起國饑舍留不去前將軍有謀又曰利先

起兵彗星犯之國用兵民亡守為兵出為旱又曰犯守  
軍欲移徙宮殿星孛于張為民流為兵大起乙巳占流  
星出入宗社昌有赦令下臣入賀蒼白雲氣入之庭中  
觴客有憂黃白天子因喜賜客黑為其分水災色赤天  
子將用兵

按漢永元銅儀張宿十七度唐開元游儀十八度舊  
去極九十七度景祐測驗張十八度距西第二星去  
極一百三度

天廟十四星在張宿南天子祖廟也明則吉微細其所  
有兵軍食不通客星中犯之有白衣會兵起又曰祠官  
有憂武密曰與虛梁同占

按天廟十四星晉志雖列于二十八宿之外而亦曰  
在張宿南與隋志所載同兼與步天歌合

翼宿二十二星天之樂府主俳倡戲樂又主外使遠客  
負海之賓星明大禮樂興四國賓動搖則蠻方使來離  
徙天子將舉兵日食王者失禮忠臣見譖為旱災暈為

樂官黜上有抱氣三敵心欲和月食亦為忠臣見譖飛  
蟲多死北方有兵女主惡之石申曰大臣有謀月犯之  
國憂其分有兵大將亡女主惡之歲星犯五穀為風所  
傷守之王道具將相忠文術用逆行入之君好畋獵熒  
惑犯之其分民饑臣下不從命邊兵起出入留舍為兵  
守之佞臣為亂填星犯之大臣憂守之主聖臣賢歲豐  
后有喜出入留舍兵起逆行則女主失政太白入或犯  
之皆為兵起出入留舍大風水災其分君不安舍左為

旱守犯勾已凌突則大臣專君令辰星令抵下臣為亂  
伏誅守之旱饑民流龍蛇見守其中兵大起同見西方  
大臣憂客星入犯之國有兵大臣憂一曰負海國有使  
來守之為兵起彗星犯之大臣憂國有兵喪星孛于翼  
亦為大臣憂其分失禮樂出則其地有謀下有兵喪芒  
所指有降人流星犯之亦為憂在大臣出則其下有兵  
入為貴臣囚繫乙巳占曰流星入天下賢士入見南夷  
來貢國有賢臣赤雲氣出入有暴兵黃而潤澤諸侯來

頁黑為國憂

按漢永元銅儀翼宿十九度唐開元游儀十八度舊  
去極九十七度景祐測驗翼宿一十八度距中行西  
第二星去極百四度

東甌五星在翼南蠻夷星也天文錄曰東甌東越也今  
永嘉郡永寧縣是也芒角動搖則蠻夷叛太白熒惑守  
之其地有兵

按東甌五星晉志在二十八宿之外乾象新書屬張

宿武密書屬翼宿與步天歌合

軫宿四星主冢宰輔臣主車騎主載任有軍出入皆占  
于軫又主風占死喪明大則車駕備移徙天子有憂就  
聚則兵起轄二星傳軫兩旁主王侯左轄為王者同姓  
右轄為異姓星明兵大起遠軫凶轄舉南蠻侵車無轄  
國有憂日食憂在將相戒車駕之官一曰后不安暈而  
生背氣其下兵起城拔視背所向擊之勝又曰王者惡  
之月食后及大臣憂月暈有兵歲早多大風歲星犯之



為火災為民疫大臣憂主庫者有罪入則其國將死守  
之國有喪七日不移有赦又曰君有憂熒惑犯之有亂  
兵入軫將軍為亂水傷稼民多妖言逆行為火為兵填  
星犯之為兵為土功入則兵敗逆行女主憂出入舍留  
六十日兵起大旱太白犯之為兵起得地入為兵守之  
亡地將憂起左角逆行至軫失地經天則兵滿野辰星  
犯之民疫大臣憂中國有貴喪守之火水入則天下以  
火為憂一曰國有喪客星犯之為兵為喪入則有土功

糴貴諸侯使來出則君使諸侯守之邊兵起民饑守轄  
軍吏憂彗星犯之為兵為喪色赤為君失道又曰天子  
起兵王公廢黜星孛于軫亦為兵喪又曰下謀上主憂  
流星犯之有兵起亦有喪不出一年庫藏空春夏犯之  
為皮革用秋冬為水旱不調

按漢永元銅儀以軫宿為十八度舊去極九十八度  
景祐測驗亦十八度去極一百度

長沙一星在軫宿中入軫二度去極百五度主壽命明

則君壽長子孫昌

青丘七星在軫東南蠻夷之國號星明則夷兵盛動搖  
夷兵為亂守常則吉

軍門二星在青丘西一曰在土司空北天子六宮之門  
主營候設豹尾旗與南門同占星非其故及客星犯之  
皆為道不通

器府三十二星在軫宿南樂器之府也明則八音和君  
臣平不明則反是客彗犯之樂官誅赤雲氣掩之天下

音樂廢

土司空四星在青丘西主界域亦曰司徒均明則天下  
豐微暗則稼穡不登太白熒惑犯之男女廢耕桑客彗  
犯之為兵起民流

按步天歌以左轄右轄二星長沙一星軍門二星土  
司空四星青丘七星器府三十二星俱屬軫宿晉志  
惟轄星長沙附于軫餘在二十八宿之外乾象新書  
以軍門器府土司空屬翼青丘屬軫武密書以軍門

屬翼餘皆屬軫今從步天歌而附見諸家之說

宋史卷五十一

宋史卷五十一考證

天文志四西南大星曰大豕目。臣召南按當作天豕

目晉隋二志可証刊本誤缺一筆耳

星直則有主執命者。隋志作有執主之命者

天大將軍十一星。晉隋二志作十二星

又五帝之車舍也主天子兵起。臣召南按晉隋二志

云主天子五兵是也此兵起字誤又東南一星曰天

倉晉隋二志無南字

參為白獸之體。臣召南按白獸應作白虎參為白虎

本天官書文晉隋二史成於唐臣之手故諱虎稱獸此志襲而未改何也

輿鬼五星。臣召南按此依晉志文也輿鬼實止四星

而中有積尸氣似星非星又一日鉄鑽誤作鐵鑽

昔共工氏之勾龍。按之下脱子字

明則王行五禮得天下之中。臣召南按晉隋二志云

明則王者行五禮得天之中是也此文脱者字衍下



字



宋史卷五十一考證



總校官庶吉士臣張能照

校對官庶吉士臣嚴福

謄錄監生臣朱溥